

## **ତୀତସଙ୍କ ନିକଟକୁ ପାଠକଙ୍କ ପତ୍ର ତିତସ ତାଣ୍ଡା ପାଞ୍ଚୁଲ ରାତ୍ନାମାନି ଆକୁ ମୂଲୁ ହାତ୍ତା**

ପାଞ୍ଚୁଲତି ସାରିଗଟା ଆକୁ ବିତ୍ରା ତିତସ ଆକୁ କୁଲମି ପିସ୍ପେ ର ମାଣସିତି ଝେସିମାନେ, ଏଟକାତି ତାନିଗଟା ଆହିମାନୁ, ତିମତି ମୂଲୁ ଆକୁ, ତିମତି ରା ଲମ୍ବର ଆକୁ ଅଡେ ପିଲିମନ □ ଈ ଆକୁ କ୍ରୀସ୍ତ ଜାନୀଆଡି ୬୩ ଚିଏ ୬୫ ବିତ୍ରା ରାସ୍ତକି ଆହାମାନେ □

ତିତସ ଏଟକା କୃତାତାସି ଆହାନା କ୍ରୀସ୍ତାନା ଆହାମାତି ର ଦାଂଗଣେଏସି ମାଚେସି, ଏଞ୍ଜାସି ମାହାପୁରୁ କାତା ଝେହ୍ନି ପାଞ୍ଚୁଲ ତଲେତାସି □ କ୍ରିତିତା ମାନି ମାହାପୁରୁ କୁଲମି ସାଲଞ୍ଜି କିହାଲି ପାଞ୍ଚୁଲ ଏଞ୍ଜାଣାଈ ଏମ୍ପାଆଁ ପିସାନା ଈ ଆକୁ ପାଣ୍ଡାନା ତାନିଗଟା ନେହ୍ନି କି ଅଣ୍ପାଲି ରାଡିମାନେସି □ ର କାତା ଈଦି କ୍ରିତିତା ମାନାରି ବିତ୍ରାଟି ହାରେକା ଲକୁ ଲାଗେଏ ପଲେଏ ଅଣ୍ପୁ ଗାଟାରି ମାଟାକି ଏନିଲେହେତି ଅଣ୍ପୁ ଗାଟାରାଈ କୁଲମିତି କାଜାରି କିହାନା ଈଟିନାୟି ମାନେ □ ଅର କାତା ଈଦି ବୁଡ଼ହାୟାଈ, ବୁଡ଼ହସିକାଣି, ଡାଆସିକାଣି, ଦାଂଗଣାୟାଣି, ହଲିୟାଈ ଏନିକି ଗତି ଗତି କିହାନା ଜାପ୍ହାଲି ଆନେ □ ତାୟୁତି କାତା ଈଦି କ୍ରୀସ୍ତାନା ଆହାମାନାରି ଏନିକି ନୀତିନାୟି ମାନେ □ ଏଞ୍ଜାରି ଜୀଞ୍ଜୁ ନନାରି ଅଡେ ସୁଦୁଗାଟାରି ଆପେରି, ଲାଗେଏତି କାତାୟାଁ ପିସ୍ପେରି, ଗଡ଼ହା କିଞ୍ଜି କିହାନା କୁଲମିତି ଗତି ଗତି କିଆପେରି □

### **ପତିତା ମାନାୟି**

୧ କୁଲମିତା ଦାମ୍ବୁଗାଟାରାଈ ଆଟାଲି ଝେହ୍ନାୟି □ ୧:୧-୧୭

୨ ଦାମ୍ବୁ ଜୀଞ୍ଜୁତଲେ ନୀତାଲି ଅଡେ ଜାପ୍ହାଲି ଝେହ୍ନାୟି □ ୨:୧-୩:୧୧

୩ ତାୟୁତି କାତା ଅଡେ ଜହରା ତଲେ ଆକୁତି ରାପ୍ନାୟି □ ୩:୧୨-୧୫

<sup>୧</sup> ପାହୁଲ, ମାହାପୁରୁତି ହଲେଏଶାତେଏଁ ଇଞ୍ଜା ଜୀସୁ କ୍ରୀସ୍ତ ତାଣାଟି ପାଣ୍ଡୁଝି ଆହାମାନାତେଏଁ ।

ମାହାପୁରୁ ଆଚାମାନି ଲକ୍ଷୁତି ନାମୁ ପାତିକିହାଲି ଅଡ଼େ କାଲାକାଲାତି ଜୀହୁ ମେଡ଼ାଆନି ଆସାତି ଦାମ୍ବୁତି ନାମୁତା ସାତାତି ଜାଗ୍ରାତା କିହାଲିତାକି ନାମୁ ପାଣ୍ଡୁଝି ଆହାମାଇଁ ।

<sup>୨</sup> କାଲାକାଲାତି ଜୀହୁତି ଆସା ହୀହାଲିତାକି, ଏମିନି ମାହାପୁରୁ ଆଞ୍ଜାମାଚେସି, ଏଞ୍ଜାସି ଏଚେଲା ମିତି ଜଲାଆଗାଟାସି ।

<sup>୩</sup> ଏ କାଲାକାଲାତି ଜୀହୁ ସାତା ମାହାପୁରୁ, ହାରେକା କାଲା ନକେଏ ଆଞ୍ଜାନା ସମାନା ବେଲାତା ତାନି ବଲୁ ଝେକ୍‌ନି ତାଣାଟି ତସାମାନେସି; ଏ ବଲୁ ଝେକ୍‌ନି ବଲୁ ମା ଗେଲ୍‌ପାନି ମାହାପୁରୁ ହୁକୁମି ତଲେ ନା ତାଣା ହେର୍‌ପି ଆହାମାଞ୍ଜାନେ ।

<sup>୪</sup> ✧ନା ସମାନା ନାମିତାସି ଅଡ଼େ ନାମୁତା ନା ଜୀହୁତି ମୀର୍‌ଏସି ତିତସ ତାଣା ଇ ଆକୁ ରାଡ଼ିମାଇଁ ।

ଆଚା ମାହାପୁରୁ ଅଡ଼େ ମାଙ୍ଗେ ଗେଲ୍‌ପାନି କ୍ରୀସ୍ତ ଜୀସୁ ମିଙ୍ଗେ କାର୍‌ମା ଅଡ଼େ ହିଡ଼ି ହିୟାପେସି ।

**କ୍ରିତିତା ତିତସ କାମା କିନାୟି**

<sup>୫</sup> ନାମୁ ଝେସ୍ତାତିଲେହେଁ ରାଆତି କାମାତି ରାପ୍‌ହାଲି ତାକି, ଅଡ଼େ ବାରେ ଗାଡ଼ାତା ପ୍ରାଚିନାଙ୍ଗାଣି କାମା ହେର୍‌ପାଲି ତାକି ନାମୁ କ୍ରିତିତା ନିଙ୍ଗେ ପିସା ଝାୟାତେଏଁ;

<sup>୬</sup> ✧ଆମ୍ବାଆସି ଦହ ହିଲାଆଗାଟାସି, ରଣ୍ଡିଏ ଡକ୍‌ଜିନି\* ଡକ୍‌ଜା, ଆମ୍ବାଆରି ମୀର୍‌କା ମାସ୍‌କା ନାମିତାରି, ଅଡ଼େ ଲାଗେଏ ପଡ଼େଏତି କାମା କିଅରିକି ମାନ୍‌ଝି ଆଆଗାଟି କାମା କିଅରି ଏଞ୍ଜାରାଇଁ ଆଡ଼ାହାଁ ପ୍ରାଚିନା କିମୁ ।

<sup>୭</sup> ଇତିହ କାଜାସି, ମାହାପୁରୁତି ଗୁମ୍‌ସା ଆହାଁ ଦହ ହିଲାଆଗାଟାସି ଆନାୟି ମାନେ; ଏଞ୍ଜାସି ଜାହାରା ମନତଲେ କିନାସି କି ଦେବୁଣିଏ କାର୍‌ବି ଆନାସି କି କାଡ଼ ଗୁହ୍‌ନାସି କି ଗଡ଼ହା କିନାସି କି ଦନ ଜୁପ୍‌କା ଗାଟାସି ଆଆନା,

---

✧ ୧:୪ ୧:୪ ୨କର ୮:୨୩; ଗାଲା ୨:୩; ୨ତିମ ୪:୧୦ ✧ ୧:୬ ୧:୬ ୧ତିମ ୩:୨-୭  
\* ୧:୬ ୧:୬ ରଣ୍ଡିଏ ବାହା ଡକ୍‌ଜି

୮ ଏଞ୍ଜି ସି ଗତାୟାଣି ଆକ୍ରା କିନାସି, ଏନାୟି ନେହାୟି ଏଦାଆଁ ଜୀଝୁ ନନାସି, ଜାହାରାୟି ଲକ୍ନାସି, ଦାମ୍ବୁଗାଟାସି, ସୁଦୁଗାଟାସି, ଇଞ୍ଜା ମେରା ମାନଞ୍ଜି ଆନାସି ଆପେସି □

୯ ଅଡ଼େ ଏନିକ୍ ଏଞ୍ଜି ଲକ୍ନୁତାକି ନେହାଁଣି ଜାପୁହାନା ରାହାଁ ହୀହାଲି ଇଞ୍ଜା ମାହାପୁରୁ କାତା କପାଟି ଝେହ୍ନାରାୟି ଲାଗାଲି ଆଡ଼ିନେସି, ଇଦାଆଁତାକି ଜାପାମାନି ନାମିନି ବଲୁ ଜାଣେ ଆସାଁ ମାଞ୍ଜୁ □

୧୦ ଇଚିହ୍ ହାରେକା ନାମାଆଗାଟି ଲକ୍ନୁ, ଉଜେଏତି କାତାତଲେ ନାଡ଼ିକିନାରି ମାନେରି, ହାରେକା ଜୀହୁଦି କ୍ରୀସ୍ତାନା ଲକ୍ନୁ ବିତ୍ରାଟି ମାନେରି □

୧୧ ଲାଗେଏତି କାତାଟି ଏଞ୍ଜାରି ଗୁତି ମୁଦା କିନାୟିମାନେ, ଏନାଆଁତାକି ଇଚିହ୍ ଏଞ୍ଜାରି ଦନ ଜୁପକାତାକି ଲାଗେଏତି କାତା ଜାପୁହିହ୍ ର.ର ଇଲୁ କୁଟମିତି ମାହାପୁରୁ ଜିରୁ ବାଣି କିନେରି □

୧୨ ଏଞ୍ଜାରି ବିତ୍ରାଟି ରଅସି ଏଞ୍ଜାରି ମାହାପୁରୁ ଅଣ୍ପୁତି ବଲୁ ଝେହ୍ନାସି ଏଲେ ଇଞ୍ଜାମାନେସି, କ୍ରିତିତା ବାସା ଆହାମାନାରି ବାରେବେଲା ମିତି ଝେହ୍ନାରି, ଜନ୍ତ ସମାନା ଅଡ଼େ ନିସ୍ତା ଇଞ୍ଜା ଚିଣ୍ଡିକାଝୁୟାଁ □

୧୩ ଇ କାତା ସାତା □ ଏଦାଆଁତାକି ଏଞ୍ଜାରାୟି ଗାତି ଦାକା ହାହାଁ ଲାଗାମୁ, ଏନିକ୍ ଏଞ୍ଜାରି ନାମୁତା ପାତା ଆନେରି □

୧୪ ସାତାତି ପିସାମାନି ଲକ୍ନୁତି ମେରା, ଜୀହୁଦି ଲକ୍ନୁତି କହୁୟାଁ, ମନ ହାଅରି ଏଦାଆଁତାକି ଏଞ୍ଜାରାୟି ଜାପୁମୁ □

୧୫ ଅଡ଼ି ଆଡ଼ି ଲକ୍ନୁତାକି ବାରେଏ ଅଡ଼ିନେ, ସାମା ପଲ୍ଲଆ ଗାଟାରାକି, ମାହାପୁରୁଇ ନାମାଆ ଗାଟାରାକି ଏନାୟି ଜିକେଏ ଅଡେଏ, ଇଚିହ୍ ଏଞ୍ଜାରି ମନ ଅଡ଼େ ଅଣ୍ପୁ ବାରେ ପଲ୍ଲଆଗାଟାୟି □

୧୬ ଏଞ୍ଜାରି ମାହାପୁରୁଇ ପୁଞ୍ଜାମାନମି ଇଞ୍ଜୁ ଜଲିନେରି, ସାମା ଏଞ୍ଜାରି କାମା ତଲେ ମାହାପୁରୁଇ ପୁନାଆତି ଲେହେଁ ଆନେରି, ଏଞ୍ଜାରି ଅପାଆଗାଟାରି, ଅଡ଼େ କାତା ଆହ୍‌ଆଗାଟାରି ବାରେ ନେହ୍ କାମାତା ପାଡ଼ାଆଅରି □

# ୨

## ନେହଁ ଦାମ୍ଭୁ ଜାପ୍ନାୟି

୧ ମା ଦାମ୍ଭୁତି କାତାୟାଁ ନେହଁ କଁ ଜାପ୍ନୁ □

୨ ବୁଡ଼ହା ଆବାୟାଁ ତଢେ ଆୟାଲି, ନେହଁ ଅଣ୍ଠୁ, ନେହଁ ବୁଦି, ଅଡ଼େ ନାମ୍ନୁ, ଜୀଝୁନନାୟି, ଇଞ୍ଜା ଅରୁହିନି ତାଣା ବାଡ଼ୁୟୁ ଆୟାଲି;

୩ ଅଡ଼େ ବୁଡ଼ହି ଇୟାସିକାଣି ଜିକେଏ ଏଲେକିହଁଏ ସାକ୍ତି ଗାଟାଇ ଇଞ୍ଜା କାଡ଼ୁ ଗହନାଇ ଆଆନା ସୁଦୁଜୀଝୁ ତଲେ ନୀତାନା ନେହଁ କାତା ଜାପ୍ନାଲି ବାତିମାଲିହଁ ଝେହ୍ମୁ;

୪ ଏନାଆଁତାକି ତାଆ ଆୟାସିକା ତାମି ତକ୍ରାୟାଁଣି, ମୀରକା ମାସ୍‌କାଣି ଜୀଝୁ ନହାଁ,

୫ ଜାହାରାଇଁ ସାପି ଆୟାଲି, ଅଟୁହା କତାନା, ଇଲୁତି ନେହଁ କଁ ଲେମ୍ବାଲି, ନେହଁ ଗୁଣୁ, ଇଞ୍ଜା ଜାହାରା ତକ୍ରାୟାଁ କାତା ମାନଝି ଆୟାଲି, ଜାପ୍ନୁ, ଏନିକଁ ମାହାପୁରୁତି ବଲୁ ନିଦାଆଏ □

୬ ଏଲେକିହଁଏ ଦାଗ୍‌ଣାୟାଁଣି ବାରେ କାତାତା ନେହଁ ବୁଦି ଆହାଲି ରାହାଁ କିଝି କିମ୍ନୁ;

୭ ନୀ ବାରେ ମାଣ୍‌କିତା ସାତା କାମାତି ନେହଁ ଗୁଣୁ ତହ୍ମୁ, ଜାପ୍ନି ତାଣା ଆଟ୍‌ଝା ଅଡ଼େ ମାନିଗାଟି ମାଣ୍‌ସି ଆହାନା ନେହଁ ହାଡ଼ା ତଲେ ଝେହ୍ମୁ □

୮ ଏନିକଁ ମିଙ୍ଗେ ଲାଗେଏ କିହାଲି ଅଣ୍ଠିମାନି ଲକୁ ମିଙ୍ଗେ ଝେଣ୍ଡେ ଝେସାଲି ଆଡ଼ାଆନା ଲାଜା ବେଟାଆନେରି □

୯ ହଲିୟାଙ୍ଗା ତାମି ସାଝୁକାରି କାତା ମାନଝି ଆହା ତୟାପେରି, ଅଡ଼େ ବାରେ କାମାତା ସାଝୁକାରିଇଁ ରାହାଁ କିନାରି ଆପେରି, ଏଝାରି ଝେଣ୍ଡେ ଜଲ୍‌ଆପେରି,

୧୦ ଏନାଆଁ ସରୁ କିଆନା ନେହଁ ନାମୁତଲେ ଚିକାଣା କାମା ତସ୍‌ପାରି, ଆତିହଁ ମାଙ୍ଗେ ଗେଲ୍‌ପାନି ମାହାପୁରୁତି ଦାମ୍ଭୁ ଜାପ୍ନାଣି ନେହାୟି ଇଞ୍ଜାଁ ଝେଙ୍ଗି କିନେରି □

୧୧ ଇଚିହଁ ବାରେ ମାଣ୍‌ସି କୁଡ଼ାଇଁ ଗେଲ୍‌ପାଲି ମାହାପୁରୁତି କାର୍ମାମେହ୍‌ନାଣି ତସାମାନେସି,

୧୨ ଅଡ଼େ ମାର ଏନିକ୍ ଲାଗେଏତି ଦାମ୍ବୁ, ଦାରତିତି ଜୁପକା ପିସାନା ଇ ନୀଏତି ଜୁଗୁତା ନେହ୍ ବୁଦି, ଦାମ୍ବୁ ଅଡ଼େ ମାହାପୁରୁତି ଆଜିତଲେ ନୀତିନ,

୧୩ ଅଡ଼େ ଏ ରାହାତି ବାସ୍ତୁ ମା କାଜା ମାହାପୁରୁ ଗେଲ୍ପାନି କ୍ରୀସ୍ତ ଜୀସୁତି ଗାଝୁରମି ତଞ୍ଜାଆନାଣି କାଚିହ୍ ଡ଼ୟିନ, ଇଦାଆତାକି ମାଙ୍ଗେ ଜାପ୍ତହି ମାଞ୍ଜାନେ □

୧୪ ☆ଏ କ୍ରୀସ୍ତ ଜୀସୁ ମା ବାରେ ଲାଗେଏ ପଲେଏ ତାଣାଟି ଗେଲ୍ପି କିୟାଲି ଅଡ଼େ ତାଙ୍ଗେତାକି ସାତା କାମାତାକି ରାହାଟି ତାନି ଲକୁ ଲେହେଁ ଅଡ଼ହାଲି ତାନୁଏ ମା ତାକି ହେରପି ଆଡ଼େସି □

୧୫ ଇ ବାରେ କାତା ଜଲ୍ଲିହ୍ ବାରେ ଅଦିକାରା ତଲେ ସାସା ହୀମ୍ବୁ, ଅଡ଼େ ଦାକା ହୀମ୍ବୁ □ ଏନିକ୍ ଆମ୍ବାଆରି ନିଙ୍ଗେ ହୀଣି କିୟାଆପେରି □

## ୩

### କ୍ରୀସ୍ତାନା ଲକୁତି କାମା ଇଞ୍ଜା ଗୁଣୁ

୧ ଦେସାତି ସାଲ୍ଡ଼ି କିନାରି ଅଦିକାରା ବେଟାଆହା ମାନାରି ତୁଇ ମାଞ୍ଜାନା, ଏଞ୍ଜାରାଲ୍ ମାନି କିହାନା, ଅଡ଼େ ବାରେ ନେହ୍ କାମା କିହାଲି ଜାଗ୍ରାତା ଆଦୁ,

୨ ଆମ୍ବାଆରାଲ୍ ନିନ୍ଦା କିଆନା, ଆମ୍ବାଆରି କପାଟି କାମା କିଆନା, ବାରେ ଲକୁ ନକିତା ଉଣା ଆହାଲି, ସୁଦୁ ସୁଞ୍ଜାଲା ତସାଲି ବାରେ ଲକୁ ନକିତା ଅଣ୍ପି କିମ୍ବୁ □

୩ ଇଚିହ୍ ମାର ଜିକେଏ ନଚେଏ ବୁଦିହିଲାଆ ଗାଟାତାୟି, କାତା ଆହୁଆ ଗାଟାତାୟି, ଲାଗେଏତି ଜିରୁଟି ହାଜିମାଚାୟି, ଏନି ଏନି ଜୁପକା ଅଡ଼େ ସୁକୁ ଦୁକୁତି ହଲିୟା ମାଚାୟି, ତାହାରା ଅଡ଼େ ତାହାରା ତଲେ ମାଚାୟି ଇଞ୍ଜା ଅପ୍ଡ଼ି ଆଆଗାଟି ଲକୁ ଆହା ଅପ୍ଡ଼ି ଆହି ହିଲାଆତାୟି □

୪ ସାମା ଏଟିବେଲା ମାଙ୍ଗେ ଗେଲ୍ପାନି ମାହାପୁରୁତି କାର୍ମା ଅଡ଼େ ମାଣ୍ଡି ଜାତି ତାକି ତାନି ଜୀଝୁନନାୟି ତଞ୍ଜାଆଡ଼େ,

୫ ଏତିବେଲା ଏଞ୍ଜାସି ମା କିତି ଦାମ୍ଭୁ କାମାତାକି ଆଏ, ସାମା ତାନି କାର୍ମାତଲେ ପୁଃନି ଜାର୍ନାତି ଏମୁତଲେ ନରହାନା, ତାନି ସୁଦୁଜୀଝୁ ତଲେ ପୁଃନି ଗାଡ଼ିକିହାଁ ଗେଲ୍‌ପାମାଞ୍ଜାନେସି,

୬ ଏ ନେହ୍ କାଝୁତି ମାଙ୍ଗେ ଗେଲ୍‌ପାନି ଜୀସୁ କ୍ରୀସ୍ତ ତାଣାଟି ହାରେପୁରେ ମା ଲାକ ହାୟାତେସି,

୭ ଏନିକ୍ ମାର ତାନି କାର୍ମାମେହ୍‌ନାଣି ତଲେ ଦାମ୍ଭୁ ଗାଟାତାୟି ଆହାନା ବାସୁ ତଲେ କାଲାକାଲାତି ଜୀଝୁତି ଅଦିକାରା ଆନାୟି □

୮ ଈ କାତା ସାତା ଆନେ □ ଅଡେ ଏନିକ୍ ମାହାପୁରୁଇଁ ନାମିନାରି ବାରେ ନେହ୍ କାମାତି ଅଣ୍‌ପିହ୍ କିନେରି, ଏଦାଆଁତାକି ଈ ବାରେ ଜାଣ୍ଡେତଲେ ଜାପୁମ୍ ଇଞ୍ଜି ନା ଅଣ୍‌ପୁ, ଈ ବାରେ ଲକୁତାକି ନେହାୟି ଇଞ୍ଜା ଅଜିତାୟି □

୯ ସାମା ଲେନିପନିଏ ବାଦିବାଦା କାତା ଜଲିନି ତାଣାଟି, ଆକୁ ଆବାୟାଁ ଦରକା ତାକି, ଗଡ଼ହା ଅଡେ ମେରାତାକି ଗଡ଼ହାଟି ହେକ ମାନାମ୍, ଇଚିହ୍ ଏ ବାରେ ଲାବା ହିଲାଆ ଉଜେଏତାଇ □

୧୦ ଜିରୁ ବାଣି କିନି ଲକୁଇଁ, ର ଦେବା ରୀ ଦେବା ଦାକା ହାହାଁ ଜାଗ୍ରାତା କିଦୁ, ଅଡେ ତାମ୍ଭୁ ଏଞ୍ଜାଣି ତାଣାଟି ହେକ ଆଦୁ;

୧୧ ଇଲେତି ଲକୁ ତାମି ଜିରୁ ବାଣାଆହା ମାନେରି, ଇଞ୍ଜା ପାପୁ କିହାଁ ଜାହାରାତି ଦହ୍ କିନେରି, ଇଦାଆଁ ମୀରୁ ପୁଞ୍ଜାମାଞ୍ଜେରି □

### ରାନି ବେଲାତା ଜାପୁନାୟି

୧୨ ☆ଏତିବେଲା ନାନୁ ମୀ ତାଣା ଆତ୍ ମା କି ତୁକିକଇଁ ପାଣ୍ଡାଲ୍, ଏତିବେଲା ନିକପଲିତା ନା ତାଣା ଖାହାଲି ଜାଡ଼ୁ ଆମ୍, ଇଚିହ୍ ପେନିଞ୍ଜେଡା ରାଢ଼େ ଏଦାଆଁ ମାଞ୍ଜାଲି ଅଣ୍‌ପାମାଇ □

୧୩ ଅକିଲା ଜିନା, ଅଡେ ଆପଲକି ଏନାୟି ଲଡ଼ାମାନେ ଏଦାଆଁ ହୀହାନା ଜିରୁ ତହ୍‌ମ୍, ଏନିକ୍ ଏଞ୍ଜାରି ଜିରୁତା ଏଞ୍ଜାରାକି ଏନାୟି ଲଡ଼ା ଆଆପେ □

୧୪ ମା ଲକୁ ଜିକେଏ ଲଡ଼ାମାନି ତୀରପୁ କାମାତା ଲେମ୍‌ଞ୍ଜି ଆହାଲି ଜାପିନାୟି ମାନେ, ଏନିକ୍ ଏଞ୍ଜାରି ପାଡ଼େୟି ହିଲାଆ ଗାଟାରିଲେହେଁ ଆଅରି □

୧୫ ନା ତଲେ ମାନି ବାରେଜାଣା ନିଜ୍ଞ ଜହରା କିହିମାଞ୍ଜାନେରି □  
ନାମୁତା ଆମ୍ବାଆରି ମାଙ୍ଗେ ଜୀଞ୍ଜୁ ନହିମାଞ୍ଜାନେରି ଏଞ୍ଜାରାଈଁ ଜହରା  
କିଦୁ, ଅଡ଼େ ମାହାପୁରୁତି କାର୍ମାମେହନାୟି ମୀ ବାରେତାକି ଆପେ □

**ପୁସ୍ତକ ଶିକ୍ଷା**

**The New Testament the Kusaal language (Ghana)**

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

**ପୁସ୍ତକ ଶିକ୍ଷା,**

**କୁସାଲ ପୁସ୍ତକ ଶିକ୍ଷା, 2020**

The New Testament in Kuvi Language

The Word for the World International

All rights reserved.

2025-05-08

---

PDF generated using Haiola and XeLaTeX on 8 May 2025 from source files

dated 8 May 2025

c688c8bf-38ac-5c00-90bd-6e4eaa165a20